

Moratorium boroskan kita?

**MUHAMMAD
REZAL
KAMEL
ARIFFIN**



INISIATIF moratorium yang dilaksanakan oleh kerajaan dari 18 Mac hingga 30 September lalu bertujuan meringankan beban rakyat yang terputus mata pencarian akibat pandemik Covid-19 dengan menambahkan kecairan tunai pada setiap isi rumah.

Kajian menunjukkan, secara purata isi rumah berupaya menyimpan antara 15 hingga 30 peratus daripada pendapatan bulanan secara tunai hasil daripada inisiatif itu. Data pada bulan keempat moratorium berlangsung menunjukkan perbelanjaan isi rumah boleh meningkat sehingga 40 peratus daripada pendapatan bulanan dibandingkan sebelum penularan Covid-19 terutama melalui platform e-dagang.

Platform e-dagang Shopee melaporkan, pengguna portalnya memperlihatkan peningkatan masa penggunaan sebanyak 20 peratus dalam seminggu dan 60 kali ganda lebih pesanan dibandingkan tempoh sama tahun lepas.

Di samping itu, pembelian panik yang bertujuan menambahkan stok simpanan keperluan secara berlebihan juga menyumbang kepada peningkatan perbelanjaan isi rumah. Fakta ini merupakan kesimpulan daripada data dapatan dalam talian oleh Institut Penyelidikan Matematik (Inspem), Universiti Putra Malaysia (UPM).

Moratorium yang sepatutnya menjadi penampan kepada pendapatan isi rumah pascamoratorium memperlihatkan impak sebaliknya di mana kecairan kewangan isi rumah menguncup antara 15 sehingga 20 peratus.

Pada masa sama, matlamat tersirat moratorium untuk

menambahkan perbelanjaan tunai setiap isi rumah bagi menggerakkan ekonomi setempat (kedai runcit, gerai) terkesan akibat kurangnya kecairan tunai masyarakat setempat.

Kegagalan mengawal perbelanjaan secara berhemah dan terjerumus ke dalam pembelian secara spontan dalam talian merupakan antara punca menyumbang kepada kemelesetan ekonomi setempat pascamoratorium kerana penguncupan perbelanjaan setempat.

PESARA

Dalam menyedari hakikat ini, Inspem menyarankan setiap isi rumah yang tidak berupaya mengimbangkan pendapatan dan perbelanjaan bulanan pascamoratorium supaya mengusahakan penambahan pendapatan antara 20 hingga 30 peratus. Disarankan juga setiap segmen masyarakat perlu membelanjakan 30 peratus daripada hasil pendapatan secara tunai pada perniagaan setempat.

Di samping itu, Inspem melihat kekuatan ekonomi setempat boleh digerak melalui peningkatan perbelanjaan antara lima hingga 15 peratus para pesara kerajaan yang berjumlah lebih 75,000 orang di seluruh negara.

Dengan anggaran konservatif bayaran pencen secara purata RM2,500 sebulan, akan terdapat kecairan tunai lebih RM187.5 juta sebulan. Ini sudah cukup untuk menggerakkan perniagaan setempat.

Rakyat yang terkesan juga dinasihatkan menggunakan khidmat nasihat Agensi Kaunseling dan Pengurusan Kredit (AKPK) untuk menjadualkan semula hutang bagi meningkatkan kecairan tunai bagi mengatasi defisit sedia ada.

PROFESOR Madya Dr. Muhammad Rezal Kamel Ariffin ialah Pengarah Institut Penyelidikan Matematik (Inspem) UPM.